



Taoba mapang Congress MLA

Bamber Thakur dak injang khaloktsü

Ukraine ceasefire atema

Vladimir Putin taginüba kar lir

VOL. XXII ISSUE NO. 150 (ADOK 150)

DIMAPUR

KÜPTOKNÜ (SATURDAY)

METSÜREMI (MARCH) 15, 2025

₹ 5.00

Russia aser Ukraine rara anentsü akok

New Delhi, March 14, 2025

(Agencies): Russian President Vladimir Putin den olemtepba sülen Russia aser Ukraine tsüingda rara anentsü lenmang lir ta US President Donald Trump-i metetdaksü.

"Yashi Russia President Vladimir Putin den olemtep tajung kaogo aser iba rara anentsü lenmang lir" ta Trump-i Truth Social post ka nung ashi.

Putin dang parnoki longbanga aliba Ukraine sepaitem taküm magitsü atema mepishio go ta Trump-isa metetdaksü.

Brihostibar aonung US envoy Steve Witkoff-i Putin den senden talangka amen ta osang

angazüker.

"Putin-i iba senden ya Witkoff ajanga Trump dang osang kar benogo. Witkoff-i Trump den osang lemsatepba sülen Russia aser US ketdangsürtemi president ana tsüingda phone call atema mapang lemtettsü" ta Kremlin spokesman Dmitry Peskov-i ashi.

"Russian aser Ukraine nati rara anentsü atema tekaratiba nung ceasefire ka agidaktsünür. Iba amaji meinyakra iba rara ajanga World War 3 adoktsü aser külen tang tashi nung nisung taküm aika samaogo" ta US president Trump-i metetdaksüogo.

WMC-i PM Modi dang free movement atema lemtet ka agitsü ayongzüker

Imphal, March 14, 2025

(Agencies): World Meitei Council (WMC)-i Prime Minister Narendra Modi dang Manipur nung aliba National highways nung free movement atema lemtet ka agitsü ayongzükerogo.

India sorkari Manipur nung aliba National highways nung free movement mapa inyakba anema nisung kari noktaker ta WMC-i ashi.

Union Home Minister Amit Shah-i March 8, 2025 nü Manipur nung National Highways ajak nung free movement tenzüksü tetuyuba agüja liasü ta parnokisa PM Modi dangi shidi zülüogo.

Timtem ajuruba highway nung kilometer 20 shi ka nung district ketdangsürtemi Motbung, Sapermeina, Kangpokpi dena

khuret agütsüba yimtsüng 10 shi nung tenük yoktsüla ta WMC-isa ayongzüker.

Centre sorkari free movement mapa tenzüksüba magizüker ta Kuki-Zo Council (KZC)-i noktaker.

March 8, 2025 ayaterm nung Kuki-Zo volunteer ka NH 102 nung Indian paramilitary forces-i tepsetba sülen highway mokdangtsü tenzüka liasü.

Iba mokdang agienba sülen NH 102 ajanga khu abenba gari 750 tema Hokolbarnü Imphal tonga aruogo. Garitem ya Kangpokpi district nung security akangshiba sülen aru.

Ajisüaka, KZC-i Manipur nung aliba highway tem nung Kuki-Zo nung alidak Meitei nung senzüba noktanger ta WMC-i PM Modi dang shiogo.

Arunachal-i family welfare ID atema bill agizük

Guwahati, March 14, 2025

(Agencies): Arunachal Pradesh sorkari family-based identification system ka agizükogo aser iba ajanga public welfare distribution tip atemtsü.

Northeast ajungalen public welfare distribution nung state nung senso masürtem agientsü atema jembiba mapang ka Arunachal sorkari iba inyakyim mulunga agizükogo.

Deputy Chief Minister Chowna Mein-i March 6, 2025 nü assembly nung Arunachal Pradesh Arun Parivar Authority Bill benok aser March 11 nü züngsem 60 agi akümba Assembly-i voice vote ajanga bill ji agizükogo.

Iba Act ajanga Arun Parivar Patra (APP) tenzüker aser iba

inyakyim ya unique family identifier ka lir aser Arun Parivar Patra Authority-i iba mapa ketdangsüa inyaktsü.

"APP ya kibongtemi beneficiary schemes angutsü atema single-point identification system ama asütsü. APP angutsüpurtemi online ajanga mesüra Common Service Centres (CSCs) ajanga tenüng agütsütsü akok. State nung sensotemi Aadhaar, proof of residence, aser basic family details ajanga APP nung zülüoktsü akok" ta Mein-i ashi.

Arun Parivar Patra Authority-i resident data repository ka ayutsü aser CSCs atema temzüngtem latettsü. Parnoki APP ya tang aliba welfare databases den sendaktepsü ta paisa ashi.

Amit Shah-i anogo asemnü atema Assam aser Mizoram semdang



Jorhat, March 14, 2025

(Agencies): Union Home Minister Amit Shah-i anogo asemnü atema Assam aser Mizoram semdang aser Hokolbar nikongdang Jorhat tonga aruogo.

Tanü Assam Chief Minister Himanta Biswa Sarma, par cabinet züngsemtem aser tongti ketdangsürtemi Jorhat airport nung Amit Shah pelaa agizük.

"Assam temeshi limai Union Minister Amit Shah Jorhat airport

nung onoki pelashishia agizüker" ta CM Sarma-i metetdaksü.

Jorhat atongba sülen Amit Shah-i Golaghat district kübok Dergaon jilao ao. Lachit Barphukan Police Academy nung pa taonung yipzüksü ta ketdangsürtemi ashi.

Honibarnep Union home minister Shah-i police academy lapoktsütsü. Iba academy nung Rs 167.4 crore endoka mezüngbuba phase renemogo ta ketdangsürtemisa ashi.

Paisa police academy nung Rs 425.48-crore housing project tanabuba phase atema lung azüngtsütsü.

Honibarnü sentong nung Union Minister for Ports, Shipping and Waterways Sarbananda Sonowal, aser CM Sarma na adentsü.

Iba sülen Ami Shah Mizoram-i aotsü aser Aizawl nungi Zokhawsang-i Assam Rifles teseptem belenba sentong nung adentsü.

Arunachal Congress-i APFRA 1978 atema BJP aitsür

Itanagar, March 14, 2025

(Agencies): BJP-i MP, Minister, aser MLA tem dang Arunachal Pradesh Freedom of Religion Act, 1978 (APFRA'78) atema public outreach campaign ka tenzüksü tetuyuba agütsüba aitsür ta Arunachal Pradesh Congress Committee (APCC)-i metetdaksüogo.

BJP-i iba Act pusema nungitba atema tebilemstü abener aser parnok kechi tangatetba nung iba ya inyaker metetnür ta Congress-i ashi.

Arunachal Pradesh BJP state unit-i sangdong ka ajanga BJP MLA ajak dang public aser media den March 20, 2025 tashi nung APFRA'78 indang osang tejangja lemsatepsü tetuyuba agüja liasü.

Iba atema APCC-i BJP dang ashishitep aketba ozüng atema osang tejangjaji kechi ta metetnüa asüngdangogo.

"BJP-i nübortem rongnung terata, aoksatepba aser tetsüba adokdaksür. Tangar tashi kar

ajanga Arunachal nung BJP züngsemtem dang 'anti-Christian law' mapa küma inyaktsü rongshir aser iba political agenda atongtsü atema sorkar tashi amshir" ta APCC General Secretary cum Spokesperson Kon Jirjo Jotham-i ashi.

"State assembly nung budget session tang ang tembangogo aser March ya senotsü shibangba tongtipang ita ka lir. Iba ama mapang ka nung MP, Minister, aser MLA temi public welfare aser senotsü onüktem atema bilema inyaktsü melena BJP-i parnok dang political mapatem inyaktsü tuyur. Kechiba BJP-i iba campaign yamai agidaktsünür?" ta Jotham-isa asüngdangogo.

"BJP-i parnok MLA sasep nung mepetmesü aliba nembangtsütsü meranger aser aruya aliba Panchayat aser Municipality elections nung parnok jenjang tajungba akümtsü meranger. BJP-i

APFRA'78 ya shitakba mapa küma tenzüksüba asü mesüra parnok yimtenren tsütsü tajangzüker angutsü atema jembir metetnür" ta paisa ashi.

"APFRA'78 ya mapang talangka mebenshi aruba, tashiyim aketba aser tensa sen meputepba ozüng ka lir. Iba Act ya Khristantem aser lisopur tamangba yimsü teloktem anema benshitsü akok. Anungji BJP sorkari iba Act agientsü mesüra lisopur sobaliba aser tamangba yimsü kümzüksüsa ajak ayimjemba ozüng ka yanglutsü ayongzüker" ta APCC-isa metetdaksüogo.

"BJP-i tamangba yimsü tsütsü telemsa adokdaksütsü asoshi inyakba politics Arunachal Pradesh nungbo takok mangutsü. Yangi nübortem mashioktsütettsü aser mashileni anir moutettsü. BJP-i iba Act atema noktakba osang tejangja yimjak nung metetdaksütsüla" ta Congress-isa ashi.

AKM-i IMDH atema tanü Public Rally ayonger

Dimapur, March 14, 2025

(TYO): Mokokchung nung Dr. Imkongliba Memorial District Hospital (IMDH) nung doctor peria maliba atema Ao Kaketshir Mungdang (AKM)-i aiben temepishiba agüjaka sorkar nungi telangzüba tajung kecha

manguba atema tejashi sayua AKM-i asüng Public Rally ka ayongzüka agitsü.


March 15, 2025 anepdang 8:00 ako nungi Mokokchung Police Point nung iba Public Rally agitsü.

Iba sentong ajanga koda

masüba tensa kar ajurutsü akok anunji public-i aremzüksü mepishir aser iba sentong nung amalitepsü aser pusema nungittsü ayongzüker ta AKM Tatong Tir Onenpong aser Tongti Tezulur Satemmongba nati sangdong ka nung metetdaksüogo.

Mulungnen O

ASO : 14/09/1929
ASU : 09/03/2025



"Ajemalu sübotsü sübor
Teti temeim agi
sünger liasü
Nü taküm tembangaka
nai mapa tajung
inyakba teti alitsü"

Onoki teti meima aliba kinungbo aser obala **A. Burchiba Kichu** (Chungtia) mapang tatsüka shiranga arudang aser asüba mapang ozü den yaritepba kija, lokti aser temulunger ajunga dang iba sapang ajanga pelaba lemsateper.

Nenok kija shia dangi arua pelaba meshitetba atema kanga sasar, saka ozü kibong dang nenoki temeim sayuba, sarasademsüba aser yaritepba atema onoki kodanga mamadoktsü. Asen Tsüngremi ner mapa tajung asoshi temoatsü tali mükeplokjang ta onoki sarasadem.

~ Temeim Kinungtsü, Chirnur, Anük-apang aser Semchirtem.

FAC Mokokchung nung Scientific Beekeeping training ayongzük



Dimapur, Metsüremi/March 14 (TYO): Department of Zoology, Fazl Ali College Mokokchung ajanga Nagaland Beekeeping & Honey Mission (NBHM), Government of Nagaland den lungjemer March 12 & 13, 2025 angotem 'Scientific Beekeeping' training ayongzüka liasü.

Ninang metsüba yimya theory aser mapa agi inyaka sayutsü nükjiong nung iba training ya ayongzük. Mezüng sentong ya Imlinungla, Head, Department of Zoology lenisüba nung agia liasü aser lai iba training nükjiong lemsatep.

Dr. I. Wati Imchen, Principal, Fazl Ali College ajanga pela agizükba o jembidang National Education Policy (NEP) 2020 den lirumedema research aser skill development agütsütsü asoshi par kakat reju-i inyakba lemsatepa liasü.

NBHM tenüng nung Temjenchuba K. Char, in-charge of Mokokchung District ajanga jembidang ninang metsüba ya rongsenketzüng ajangzükba kisüng masü saka libajen nunga tajangzük lir ta ashi.

Tanü-asüng ninang metsüba nung scientific hadir balala amshiyim pai rateta ashi.

FAC nungi kaketshir tejen aser District-Level Award for Best Beekeeper 2024 sempet angur Dr. Sentiwati Aier-i Nagaland nung aser talisa Mokokchung nung ninang metsüba indang onük jembia liasü.

Nzanbemo K. Lotha, Nodal Officer of NBHM ajanga honeybee takum aser yimya indang rateta ashi aser mojitzü tali agizüktsü asoshi scientific yimya amshiba aser tajangzük balala indang lematepa liasü.

Ninang tesepe anepaluyim, tashidak balala aziökba, ninang mojitzü timba agizüktsü asoshi

tasa balala iba training nung angazükdakja liasü.

Temjenchuba K. Char aser Dr. Sentiwati Aier nati achayanga Khensa yimtsüng nungi ninang metsür Akangneken-i 'traditional box' nungi 'scientific bee box' dangi ninang belenba yimyatam sayua liasü.

Iba training nung shilem agirtem dang ninang tabu balala aser parnok teinyaktsü mapa balala indang jangja angazükdaksü aser college campus nung NBHM nungi scientific bee box nung ninang puoka liasü.

Ananü buba training ya Yisemyong nung Dr. Sentiwati Aier'er Apiary nung agia liasü. Iba sentong nung Skill Enhancement Course (Apiculture) kübok tenüng zülüoka aliba kaketshirtem, Zoology indang core students, tesayur aser staff tem dena liasü.

Khonoma nung Chümerie benjong amung



Kohima, Metsüremi/March 14 (TYO): Kohima district kübok Khonoma village nung Khonoma Women Union ajanga March 14, 2025 nü Chümerie (Garlic) Festival ayongzüka mungogo.

Iba benjong ya Myki Village Adoption Initiative kübok Women Resource Development ajanga sponsor asü aser Horticulture aser Agriculture Departments ajanga co-sponsor süa liasü.

Iba benjong akhumdong ama Minister, Rural Development, Metsubo Jamir-i jembidang, yimdak-yimtsüng terenlok maparen koda tongtipang ta asüba aser alu nungi züsentetbatem temaba jenjangi ajungkettsü indang lemsatepa liasü.

Aluyimer temi züsentetba nungi jenjang tajungtiba nung tajangzük angutsü asoshi anepaluba aser wazüka ayuba ya tongtipang lir, ta pai ashi aser Khonoma nung akhu yimya aser sustainable agricultural practices amshiba atema tenügsang agütsü aser mapang talangka yimtsüng nung yimchiyimjung alitsü asoshi sustainable farming tongtipang lir, ta Minister Metsubo Jamir-i ashi.

Lanurtem den jembidang pai sorkar mapa nung ranglokba melena skill nung ajemdaker pei peria litetba nung ranglokttsü ayongzük aser pei peria alitsü aser rongsenketzüng aintsü

atema skill development training nüngdaker, ta ashi.

Khonoma nung aluyimer yaritsü asoshi Minister Metsubo-i akokba lenmangtem nungi aluyimba dak sendakba teyari agütsütsü nangzük aser Khonoma nung garlic processing units amenoktsütsü sangdong.

Ano yimtsüng nung züsentetba aonsotsü aser osettsüset belenba nung yaritsü asoshi department nungi Tata Mobile gari ka pai tenla agüja liasü. Zhothisa Dawhuo, Commissioner & Secretary, Women Resource Development ajanga iba sentong nung jembidang tetsür aluyimer yaria sentong aser tasa balala yanglua aliba indang lemsatep.

Ano Horticulture aser Agriculture Departments indang Director temia o tatsütsü jembidang garlic farming aser agribusiness maangka aser lenmang tem lemsatepa liasü.

KWU tir Sieno Sakhrie-i tayongzükba o jembidang union ajanga yimtsüng nung garlic farming atema mera agiba indang lemsatepa liasü.

Iba sentong nung Vimesano Meyase aser Rajuseli Chücha menden liasü, Rev. Tsolie Chase-i sentong tenzüka sarasadem aser Kekhrieno Mor, Member of the Nagaland State Commission for Women (NSCW) ajanga melepzüng o jembia liasü.

Finance Department ajanga sangdonger

Dimapur, Metsüremi/March 14 (TYO): Department of Finance ajanga sangdong ka nung March 15, 22, 29 aser 31 anogotem non-transaction days

süaka Government Bills tem shidak tsütateptsü mechi Nagaland nung state Treasuries aser Banks atema transaction days alitsü, ta metetdaksü.

Mima aser Tsütuoniomia Thinuo Council akangjungshitep



Mima Village aser Tsütuoniomia Thinuo nungi tantsü-tambo aser lenirtem külemi tangokba noksa ka yangi angur.

Kohima, Metsüremi/March 14 (TYO): Telungjem aser kati ka akumtsübobä temaitsü sayua Southern Angami Region nung Mima Village aser Kohima Village nungi Tsütuoniomia Thinuo züngsemtem March 14, 2025 nü Khrietho Kehou (Friendship Meet) benjongtsü ajurutepa liasü, koba yimtsüng ana

nung alirtem tsüngta tesendaktep aser yimjung temaitsü lir.

Iba sentong ya Mima local ground nung agi, kong yimtsüng ana nungi lenir, tebu-teti aser lanurtem adenshia küm ter dak tema tesendaktep aliba akhum agüja liasü.

Friendship Meet ya Mima Village ajanga ayongzük, koba

June 2012 nung putu menden ana nungi lenirtem aser tebu-teti nungeri yimjung tezüngzüktep agiba temaitsü lir.

Tarutsü nung yimtsüng ana tsüngta rara mesüra tsükchitep malitsü aser yimjung nung alitsü sangdonga yimtsüng ana nungi tebu-teti nungeri iba tezüngzüktep ya yanglua liasü.

Ajidang masü yimtsüng ana ya alima mesama tashi tesendaktep tajung nung alitsü züngzüktepa liasü.

Sentong tenzüka Mima Village chairman Kamo Leno-i pela agizükba o jembidang iba sentong indang

rateta ashi aser Tsütuoniomia Thinuo Council (TTC) dang pelaba lemsatepa liasü.

T Khel Council chairman K. Neibou Sekhose-ia salem o lemsatep aser yimtsüng ana tsüngta iba tesendaktep tajung ya kanga tongtipang lir ta nenshia ashi.

CRC Mima indang pastor Kho-o Pfukha aser Advisor, Tsütuoniomia Thinuo Council, Vikuolie T. Zatsu natia lokti den tayongzükba o jembia liasü.


O jembirtemi lanirtem dang pei tetsü-tebou nungeri bendanga agütsür inyakba teti bilemtettsü ajungshia liasü.

Zatsu-i lanurtem dang meranga inyaktsü, ochishia alitsü aser dangar dak metaloka malitsü ayongzük.

Sentong nung Ketoulekho Ngukha, VDB Secretary Mima menden liasü aser Rev. Dr. Vichükho Ngukha, Chaplain, Patkai Christian College Chümoukedima ajanga sarasadema sentong tenzüka.

Khriesavilie Khamo, GB Mima Village ajanga melepzüng o jembi aser sentong nung

Tsütuoniomia Youth aser Mima Christian Youth ajanga sobaliba ken ka aser temeja ken ka tena liasü.



March 14, 2025 nü Chennai nung Parliamentary constituency re-delimitation atema tentetba Joint Action Group senden nung Kerala Chief Minister, Pinarayi Vijayan agizükba noksa nung angur.

TeintetsensotemAyushman card atema küm telatetji 60 asütsüla

New Delhi, Metsüremi/ March 14 (Agencies): Heath & Family welfare indang parliamentary standing committee-i sorkar dang, arrshi küm 70 ser temapur teintet sensotem nem Ayushman Vay Vandana Cards agütsüba ya arrshi küm 60 tashi ajemtsütsüla, ta benok.

Rajya Sabha MP, Ram Gopal Yadav-i aniba Parliamentary Committee-isa Ayushman Bharat PM Jan Arogya Yojana scheme kübok küm shia kibongtem atema health coverage sen lakh 5 tashi aliba ya sen lakh 10 kümtsütsüla, ta benok.

Tawa Centre sorkari ABPMJAY scheme ajanga

arrshi küm 70 ser temapur teintet sensotem-a ayimjemogo, aser tang Parliamentary committee-i iba scheme ajanga arrshi küm 60 ser temapur ajak ayimjemtsü mepishir.

Department of health & family welfare-i 2025-26 kümsük atema 'demands for grants' 153buba report nung ajemdaker Bodhbarnü Parliament House anaprongla nung item tebilemba onük kar benokogo.

Parliamentary committee-i, states aser Union Territories nem lezmüksütsüba senotsüji parnoki card yangluba, hospital admissions aser tajangzük angurtemi lemsatepba onüktem den sendakteptsüla, aser item

senotsüji ajanga tenüngdaktiba tesemtem nung lezmüksütsüla, ta metetdaksü.

"ABPMJAY kübok empanelled hospitals nem senotsü menoa magütsüba osangtem committee-i jangjaogo aser state aika nung jenjang mereprangshi, aser ibaji ajanga empanelled hospitals-i shirangertem nem treatment agütsütsü memelungba ajanga aikati timtem ajangshir," ta Parliamentary Committee-i metetdaksü.

"Anungji jenjang melatetba states aser UTs dang 2022 küm state kari latetba ama jenjang latettsü atema ajungshitsüla," ta committee-i metetdaksü.

Taoba mapang Congress MLA Bamber Thakur dak injang khaloktsü



Bamber Thakur hospital-i anir aodang tangokba noksa nung angur.

New Delhi, Metsüremi/ March 14 (Agencies): Hokolbarnü Himachal Pradesh nung mejangjaba nisung kari taoba mapang Congress MLA, Bamber Thakur par kidang lia pa dak injang khaloktsü, ta police-i metetdaksü.

Iba tatalokba nung Thakur den külemi pa indang personal security officer (PSO) naprongla injang agi yiruogo. Mejangjaba nisungtem jagi injang 12 shi khalokja liasü.

Himachal state kübok Bilaspur yimti nung Thakur par kima moapu nung lia

nisung pezü prangpong amer aruba sülen pa dak injang khaloktsü.

Tenük kuli alir kati ashiba agi, parnoki injang 12 shi khaloktsüba sülen tetsüng agi market tsütsüleni jena oadok.

Injang aika khaloktsüyonga Thakur injang ka agi dang pa tetsüng nung khashi aser pa indang security officer-a yiru.

Superintendent of Police Sandeep Dhawal-i, "Aibelenertemji aputsü atema gari lenmang aser highways densema tesem ajak mita

odar," ta metetdaksü.

State Chief Minister Sukhvinder Singh Sukhu-i, "Ni Bamber Thakur den jembiogo aser pa dang AIIMS nung treatment agitsü ajungshi saka pai IGMC Shimla nung ang treatment agitsü melungtet. Pa nem medical treatment tajungtiba agüjang ta ni Deputy Commissioner nem tetuyuba agütsüogo," ta metetdaksü.

Thakur Indira Gandhi Medical College (IGMC), Shimla nung treatment agidar aser in indang security officer AIIMS Bilaspur-i anir ogo.

Alimanungkiralongra tiyongtsüji Pakistan lir: India

New Delhi, March 14 (Agencies): Anogo ishika tejaklen Pakistan kübok Balochistan nung train ka amakba nung India-ia shilem agia lir, ta Pakistan-i India nem tai tongloktsü, ajisüaka India-ibo shilem agia mali, ta metetdaksüogo.

Pakistan-i, train amakertemji Afghanistan nungi liasü aser ibaji India-i sponsor asü, ta India nem tai tonglokja lir.

March 11 nü Jaffar Express train nung passenger 450 toudak mapang nung Balochistan Liberation Army (BLA)-i tashiyim amshia amak.

Pakistan foreign office otongdar, Shafqat Ali Khan-i, train hijak asüba dak sendakba phone call temji Afghanistan nungi liasü ta onoki jangjaogo, ta metetdaksü.

Paisa, "Onok mapatong nung temelenshi mali. Pakistan anema kiralongraba nung India-i shilem agir. Tang iba tatalokba nung phone call temji Afghanistan nungi liasü. Ni yamaji jembia liasü," ta metetdaksü.

Pakistan-i Inda nem tai tongloktsüba dak sendakba

nung India Ministry of External Affairs-i, Pakistan-i tajemdakdak kecha makai tai tongloktsür, ta metetdaksü.

MEA otongdari, "Alima nung kiralongra tiyongtsü tesemji Pakistan lir, ta alimai meteta dang lir. Islamabad-i tangar nem tai tongloktsüba dang nungibo parnok telung timtem aser tamakok balala meyipa reprangshitsüla," ta metetdaksü.

MEA-i sangdong ka ajanga, "Pakistan-i kuli kecha makai tai tongloktsüba onoki sashia aitsür. Alima nung kiralongra tiyongtsü tesemji kong aliar alimai meteta dang lir," ta metetdaksü.

Ano külen Pakistan-i tai tongloktsüba dak sendakba nung Afghanistan foreign affairs ministry-ia, "Balochistan nung passenger train ka amakba dak sendakba nung Pakistani army otongdari Afghanistan nem tai tongloktsüba onoki magizüker aser Pakistan dang nüngdak makaba o jembiba dang nungibo pei sasa security aser telung tebilemtsü onük balala bentettsü atema dang nendaka inyaksü mepishir," ta metetdaksü.

BJP aser RSS-i Mahatma Gandhi'er semchir Tushar aputsü akhanger



Tushar Gandhi

"Kodang ni o kar jembizüka yokdir ni ibaji meyipa magir mesüra item o jembiba atemaji tatok memeshir," ta metetdaksü.

"Tang iba tatalokba ajanga, linük ashioktsürtem maneni jungkai adoktsütsü atema ni tashi itshir. Linük nüchiso atema raraba dang nungibo iba rara ya tenüngdakba. Tang asenok ajak atema kasa tsükchirji Sangh lir. Parnok jungkai adoktsütsüla," ta paisa ashi.

New Delhi, March 14 (Agencies): Hokolbarnü Mahatma Gandhi'er tanaben semchir, Tushar Gandhi-i, ni RSS aser BJP anema jembiba o meyipa magitsü mesüra parnok dang tatok memeshitsü, ta metetdaksü.

Ano külen BJP aser RSS natibo Tushar aputsü takhangba agütsür.

Tawa Kerala yimtiba, Thiruvananthapuram kübok Neyyattinkara nung Gandhi tangatetba sülen anidaker, asür P Gopinathan Nair indang kürakyanglu semzüksüba sentong nung jembidang Tushar Gandhi-i, BJP aser RSS na ya lendong aser telung nungbo tsükchirtem lir, aser parnok Kerala telungi aitogo, ta jembia liasü.

Paisa, "RSS ya miim lir" ta jembiba sülen BJP-RSS nung inyakertemi pa anema yimyim ayima pa mena aliba gari nokdanga liasü.

Hokolbarnü Kochi anasa Aluva nung sentong ka nung jembidang Tushar Gandhi-i,

Paisa, ozü oboula tepsetertem nungi jakzükertemi Mahatma Gandhi kürakyanglu alidaki aotsü aser injang khaloktsütsüa akok, kechiyong parnok iba yimyaji sübaogo, ta ashi.

Taoba mapang Union Minister of State aser BJP lenir, V Muraleedharan-i, küm aika Tushar Gandhi-i Mahatma Gandhi tenüng ajanga tajangzük angutsü meranger, ta aitsü.

Neyyattinkara nung Tushar anema longkak aitba sentong nung jembidang pai, Tushar tenüng nung Gandhi densema aliba ajanga pai linük tebuti Mahatma Gandhi ama kasa akhüm angutsü temsüa mali, ta metetdaksü.

Paisa, BJP-i tashishiba ken o agütsüba nung ajemdaker Tushar Gandhi aputsüla, ta takhangba agütsü.

BJP lenirsa, Tushar Gandhi anema yimyim ayimba atema RSS-BJP nung inyaker pongu apuba atema Kerala nung Pinarayi Vijayan-i aniba sorkar aitsü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 15, 2025

Tangar kidang chisu ayurtem

Tsürabur jembishinü nung tangar kidang chisu ayurtem tetezü pei kidang chiyongtsü maka tangar kidang chiyonga senzürtem dang ajar. Aji oda, tsüraburtem mapang item ama tangar kidang chisu yur alirtemji yimtak sensakertem ishika takar lu nung ayanga tanüa tanü poksüng ngua chia-jema alirtem ser alitsü. Ajisüaka, tanübo asenok Naga nunger ajak tangar kidang chisu yur alir kidang monger kümogo. Iba tiaji tang ama Nagaland nung tsümartem benjong mapang meteter. Aji oda, yashi India ajaklen Hindu nunger rong teptepba tepela holi benjong liasü aser kasa benjongji Nagaland nunga tsümar longsua alidak, talisa, Dimapur nungbo Hindu nungertemi lapokba dokanbo ajak shibanger kanga reta tsünga mungogo. Pei kin aser tamangba yimsü dak aketba benjong among nungji kecha tai mali, anungji asenokibo manemer aser medemer peladaktsütsü asoshi Naga nungertemia karibo rongji teptepa shilem agir. Iba ama tamangba yimsü balaka aser sobalibaa balaka süaka tangar tamangba yimsü benjong nung külemküja nung medenra rong teptepa pelatepba nungjibo asenok tetsüng memetsütsüsa asenok dak tangatetba alitsüla ta bilemer. Ajisüaka, tanü yangi asenok den lemsatepnüba onükjibo tangar benjong nung oa adentsüla asü madentsüla ta asüba tebilemtsü onük masü saka tsümar benjong amongnübo asenok atep nung mia dena maputettetsüsa akümba tia ya asenok ajaki kanga süoki ia bilemtsüba tensa tia ka kümogo ta shinür. Aji oda, tsümar holi benjong amongnübo asen lima shishilembadak ajak shibanger amongtsüsa litetba ya parnok asenok asaa timtemdaktsüdi ta ser inyakba mapa ka masü saka asenoki asenoksasa yamaji alitsüsa parnok nem aseni inyaktsüba mapa, khuret aser temoatsü ajak agütsüba ajanga ataloker. Kasaji, Muslim nungertem Id benjong amongba anogo nung Dimapur nungbo Muslim nungertemi lapokba dokanbo ajak shibanger amongtsü, anungji shishilemdak shi anggo kecha mangutsü aser tula süoshi, tsüngsem aser chipo aonpo ayokba dokanema ajak shibangtsü. Iba amaji tanü asen lima nung asenok government mapa nungi anguba ita sen tilaka bener tsümartem dokan nung metsü mersü, shini mamatzü aser süoshi nungi tenzüker kisü-jensü dang agiba oset alidang sen jagi meperi ser baki yutsütsü ta asenok chisuji tzümartem ket nung dang yua lir. Nagaland nung dokan lapoka shishilembaba ya kin aser tamangba yimsü shia pei pei sobaliba kümer shishir. Aji oda, Hindu nungertemi kisüjensü dang agiba osettem, sü aser terenem süoshi, yipten aser menden, computers aser jangotsütem ayoker aser ano külen Muslim nungertemi akshi maden shi anggo, aonsutsü, tsüngsem, chipo aonpo, second hand süoshi aser electronic osettem ayoker. Ano shishilemba dak tesem kar nung Budhist nungertemi süoshi ayoker, anungji kodangsa tangar Hindu, Muslim aser Budhist nunger benjong mongdir, item pei pei lapokba dokanem shibanger amonger, anungji Nagaland nung tangar tsümar tamangba yimsü benjong amongba anogo nungbo asen lima nung yimti tuluba kabo tesadang ka dang nungi tuluba shibanger amongtsü. Iba ama tangar kidang chisu yua aliba tia yagi asenok mulungjang nung jembidaktsütsüla aser talisa lanurtemi tzümar melenaji asen lima ajaklen dokan lapoka amen tenzüksüla. Tangbo asen lima nung asenoki ayoktsüsa züsentetba aser yanglutetba maka, anungji tangari züsentetba aser yanglutetbatemji danga asenoki ayoktsüsa asenok dak tejangraba aser temetetba alitsüla. Alimabo asen lima saka shishilembadak dokan ajunga bendanger ket nung lir aser yamaji asenoki aaba sen ajak parnok ket nung yutsür, anungji asenok yabo tazüng, kecha maka, tangari dokan melapoktsüra asen ket nung ita sen nungi anguba sen tera aliba jagia kecha malitet, asenok timatemtsüba tensa tia ka nung asenok liadokogo. Aji oda, asen lima nung dokan kibur ajak tangar aser parnok dokan nung asen jala jabasotem ita sen mechimenuka agia kilir mapa inyaka alir. Aji dang masü saka asenok dang nungi bendenba rongsen kümzüka ayutsü atema tzümar takar kidang asen nisung asangurtem kinüker mapa inyakdaktsür. Iba tia ya kodang bilemdangdir, asenok ya India yimten kübok alener aliba tia nungi dang masü saka asen lima nung India nunger rongsen tashi kübok asenok parnok kilir aser kinüker kümer aliba tia nungia asenoksasa salateta nüchi akümtsü nüngdaker.

OLEMSABANG

Arogo aser Yimden: Tepila aser Tesendaktep

Wati Longchar (Eralibill)

(Yashi adok nungi...)

Yimden yanglushiba nung Tamanger ka shilem

Yimden yanglushiba nung tamanger ajak shilem kar. Nisung ajak ya politician kaka ta ashitsü akok. Nia politician ka, saka political party ka nunga züngsem masü aser party ka atema noktakba politician masü. Political party kecha nunga join mesüi lokti asoshi inyakba politician ka. Anungji political party kobaisa, mesura yimden lenir shibaisa ochimashi inyaker parnok anema jembir. Party kobai nübur rongnung telemsa mali, ochi nung mapa tajung inyaker parnokji junger ta noktakba politican ka. Alima rangpen yanglushitsü, ochi inyaktsü aser sensaker, meshimejunger ajemoka yutsüba, rarapangsen adokdaktsüba, pei ajungtsü bilemba lenir tai tuteta ashir asü nungji pastor, arogo nung tenzüker ajak ya politician ka ka ta ashitsü akok. Anungji nübur ajaki Khristan ka ama politics nung shilem agitsüla:

- Ochi nung tasü ita noktaktetba lenir aser lokti rangpen (Hindu dang mesüra shilu ka, kin ka, constituency ka ajungtsü atema dang masü) ajungtsü, renlokdaktsütsü nükla akaba lenir shimtsüla. Iba nungji nubur ajak shilem lir. Ibai Lai tesayuba lir ta angatetdi.
- India lima ama ka nung kong shilu balala, tamangba yimsü balala, oshi aika, sobaliba balala aika aliba lima ka nung government shibai nübur ajak kümzüka yuteter, akhümtsübuttsü sayur aser wazüka ayutsü sentong lir iba yimdenji shimtsüla. Secular party koda tongtibang, Temzüng wazüka ayutsü aser alima tejakleni odaktsütsü asoshi ochi lenir koda tongtibang aji nübur nem angatetdaktsütsüla.
- Lokti terenlok asoshi mapa agi inyakteta sayuba aser nükla tejangja akaba Government shimtsüla.
- Ochimashi, lokti rongsen/sen auüyar lenir, tashiyim amshinüba, teyaksang, khonang-naroküm arishiba lenir meshimtsüla. Parnok anema ochi ola adoktsüla.
- Nüburtem nungdak angatetba lenir, ochi nung azüitba, nübur rongnung tebendang mali meimba; pei anisüngzüker aser ajungtsü asoshi dang bilemba lenir masü, saka nübur nungdak tama abensadaktsütsü ta aria bilemba lenir shimtsü nüburtem ajongmesotsüla.

Laloo Prasad-i ashi ama, gari gear neutral nung ayu nungbo maotsü, gear enok nung dang aotsü. Arogo nung toklang tenzükeri yimden latet nung ochi nung yamai südi ta shilem agitsüla, ainkar ola adoktsüla. Pei adianu, yimer asaa masü, ochi nung meyongnem agütsüba den, sabang balala nung, talisa pulpit nungi political education sayutsüla, talisa Khristan ka ama ochi nung noktaktettsüba tasü tait lenir shimtsü sayutsüla. Tejangrar, yimsüsütsü sempet aketer aser nübur meimer shirnoki lokti yanglushia tejakleni anitsü mulungteter parnoki tata menden asoshi tokteptsüla. Mosa Israel nüchiso asoshi noktakba lenir ka liasü (Anitet. 1:1-22), Amos ainkar ochimashi yimsüsür anema lokti yanglushitsü ajongmesor lenir ka liasü (Amos 5:21-25), Mosa aser Nathan ainkari ochi mashi yimsüsür anema apuso, kechiaser parnok ochi meim, nüburtem meim aser sensaker, meshimejunger alaashia meyutsütsüla ta angatet. Yisu Khristai ochi mashi, sen meimer aser tashiyim yimsüsür anema noktak (Yohan 2:13-17), yongji pa kangki nung tepset. Tanü Nagaland nung ochi shir lenir nungdak ta tesayuba tejangja tasü tait ola adoktsüla. Gari anitsü asoshi driver tajung nungdak. Driver tamajungi anira accident ajurutsü; gari nung mena alirtem yirutsü aser asütsü. Nagaland tejakleni anitsü asoshi driver tajung nungdak. Tetezü, tasü tait, ochishir, nübur meimba lenir shimtsüla aser ochi kuli arogoi kuli asütsüla. Ochishir nem Nagaland yimsü südaktsüdi. Kasaji ochishir nem arogo anidaktsüdi. Laishibai ochi yimsüsür shimang ta nungloktsübaji arogo leniri anir atalokdaktsüdi arung.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Seoul nung WEA Seoul General Assembly Office semzük



March 11, 2025 nü South Korea yimtiba, Seoul nung WEA Seoul General Assembly Office semzükba sentong nung (tejaklen ajichilen nungi) Dr. Jae-sung Kim, WEA Deputy Secretary-General Rev. Samuel Chiang, Rev. Jung-hyunOh aser Rev. Gye-heon Jeon nungeri office semzükdang tangokba noksa nung angur.

Seoul, Metsüremi/March 14 (Agencies): March 11, 2025 nikongdang South Korea yimtiba, Seoul nung aliba International Discipleship Training Center indang ki tamentep pongububa nung WEA Seoul General Assembly Office semzükba sentong agiogo.

Taküm October ita nung World Evangelical Alliance (WEA) General Assembly agitsü lia WEA Seoul General Assembly Office tasen semzüker.

Dr. Jae-sung Kim, WEA Deputy Secretary-General Rev. Samuel Chiang, Rev. Jung-hyunOh aser Rev. Gye-heon Jeon nungeri 'ribbon' mejepdanga office semzük.

Iba sentong ya planning committee nung züngsem, Rev. Yeon-jong Ju leniba nung agi. Theological committee nung züngsem Rev. Guk-jin Lee

leniba nung sarasadem, Sarang Arogo nung tongti pastor, Rev. Ju. Rev. Jung-hyun Oh-i Lai zünga "Mamangertem atema Ni nenok tesangwa kümdaktsütsü" onük nung sayutsüngia liasü.

Rev. Oh-i, alima nung Arogo tiyongtsüji anüolen tsütsü liasü ajsüaka tangbo Korean Arogoia shilem agir, ta ashi. Rev. Oh-i, "Joko mapang talangka Korean Arogo-a kera anidaker ka liasü, saka tangbo kera aoer ka akümtsü mapang tongogo.

Asenoki sarasademtsüla, Tsüngrem O nung tera ayangtsüla aser alima nung Arogo tenzüksüla," ta ashi.

Kasa sentong nung WEA Deputy Secretary General Rev. Samuel Chiang aser organizing committee nung advisor, Rev. Gye-heon Jeon nati tenüngsang agütsüba o jembi.

Tesüsa Sungkyul University nung Tir, Rev. Sang-sik Kim-i sarasadema sentong tembangba sülen osangbenertem senden ka ayongzüka liasü.

Osangbenertem senden nungji Rev. Oh-i, telok kati WEA Seoul General Assembly anema nokdakba indang metetdakja liasü.

Paisa, "Tebilemtsü onük kar danga lira iba atemaji April ita nung theological forum ka ayongzüka akatsü," ta metetdaktsü.

WEA ya 1846 küm tenteta liasü aser parnok indang headquarters ji New York nung lir. Tang WEA nung linük 143 nungi member organizations lir.

ANOGO ABEN TSÜNGREM DEN

Maneni jajang

"Nenok rongnung shibai Kibuba tsübur, aser Pa tenzüker ola angar? Shiba am mang nung jajar aser tesangwa mali Pa Tsüngrem dak imlaa lidakjang."

Isaia 50: 10.

Tsüngrem Tanelai aniba takümji tesüngmangtsü lir. Pa adenba metetba agi takok ngua taküm alir, aser ochiji jakla ta meteta alir. Saka Pa adenba memetetra kechi? Kuli kar ajanga Tsüngremi Pa temoatsütem sotra kechi? Nai Tsüngrem den temulung lemteta jajar saka tiaji mejungi kümra kechi inyaktsü ?

Isaiai idaki temenen am mang indang mesüra iba lima am mang indang mejembir.Pai tarutsü mejangjaba am mang indang jembi. Kati iba mapang nung kechi inyaktsü ? Isaiai asenok dang ashir, am mang temelem süaka asenoki maneni jajatsüla. Tesangwa nung asenoki tanabuba meraji angutsü. Tejakdang aliba le mangji tejangja. Tsükchir nungi asenoki tembar ka metet, aser temetsüdaktsüji kong lir asenoki angur. Saka kodang am mang arudir atsüngzü kang, menang, anenang! ta ashir ama asenokibo angateter. Tanabuba mera asoshi asenoki tsübu aiter. Isaiai tanen ta ashir. Tesüiba jungkai adokba tesangwa nung maneni jajaang ta ashir. Tsüngrem tenzü kba mapa nung am mang dena lir, Tsüngremi na ajungkettsü ta angatetang. Ne tamang nung temulung lema melidaktsütsü asoshi Pai Pa atenba ken sotta atardang. Isaiai ashiba angang. Jajaang. Tsüngremi tesangwa nung ne dang kechi sayu, aji bilema am mang nung arendaka teli.

Kibuba, kü tetendangba nung am mang ajanga Ne ochibai ni ani nung, Ne tenüng asanger.

Tesüiba küm 10 tsüngda UK nung Tenla ki 3500 dak tali shibangogo

March 14, 2025: Tesüiba küm 10 tsüngda UK nung Tenla ki 3,500 dak tali shibangogo aser item Tenla ki aika 'spas', nisungtem alitsü kiojen aser karbo nightclubs kümogo, ta osang ka ajanga metetdaktsü.

National Churches Trust-i, Tenla ki 3000 nungi 5000 shi kar shibangogo aser karbo vicar toklang maliba agi kangabo mamshir, ta metetdaktsü.

Iba dak alia South Shropshire, Louth aser Horncastle region tem nunga Tenla ki aika shibangtsüsa tensa ka nung lir; item region shia nung Tenla 19 bosa shibangtsüsa tensa ka nung lir, ta Historic England's Heritage at Risk Register data ajanga metetdaktsü.

Church of England nung lenir kati, "Tensaji kanga majungbo masü, kechiyong küm shia Tenla ki 15 nungi 20 shi dang ayoker. Linük tesem balala nung Arogo indang kiojen 15,000 dak tali lir, aser iba atemaji onoki nüma atanger," ta metetdaktsü.

Paisa, "Temzüngtem lir-

tatishitsü agi, Arogo kiojentemji mosques ama amshitsü memelatsü. Yaküm August ita nunga Stoke-on-Trent nung mamshiba Tenla ki ka mosque küma amshitsü sentong liasü saka Church of England-i nokdang," ta metetdaktsü.

Ajisüaka Woking nung aliba United Reformed Church indang Tenla ki kabo Islamic telok kati alizükogo aser ibaji community centre aser mosque ama amshitsü.

Ano Tenla ki karbo nightclubs kümogo; Salisbury, Wiltshire nung aliba Pentecost Tenla kibo tang The Chapel Nightclub lir aser Bournemouth nung St Andrew's United Reformed Church indang Tenla ki kata Sanctum nightclub kümogo.

National Churches Trust-i, linük tesem balala nung Arogo kiojentem mosque aser nightclubs ama amshiba nokdangtsü atema Trust-i inyaktsü, ta metetdaktsü.

Parnokisa, 2023 küm Trust-i Tenla ki tenetbo Heritage At Risk Register nungi anitetogo, ta metetdaktsü.

'Encountering God' sentong nung nisung 4000-i Khrista agizük



March 8, 2025 nü Ethiopia yimtiba, Addis Ababa nung aliba Meskel Square nung 'Encountering God' sentong nung adenertem tangokba noksa nung angur.

March 14, 2025: March 8-9 anogotem nung Ethiopia yimtiba, Addis Ababa nung aliba Meskel Square nung evangelical sentong ana nung nisung 4000-i Khrista nem taküm bendanga agütsüogo, ta Billy Graham Evangelical Association (BGEA)-i metetdaktsü.

"Encountering God" sentong nungji Franklin Graham-i sayutsüngia liasü.

Franklin Graham-i tang agi 11benbuba Ethiopia semdangogo. Küm 65 tejaklen tebu, Billy Graham-i Ethiopia nung sayutsüngia liasü.

Osangbenertem den jembidang Graham-i, "Alima kanga melenshiogo, yimtenren melenshiogo, ajisüaka Khrista osangtajungbo kodanga

memelenshir. Osangtajungji yashi, tanü aser teti kasa dang," ta metetdaktsü.

Outreach sentong ya Ethiopian Council of Gospel Believers' Churches-i ayongzüka liasü. Iba Council nung linük nung aliba Arogo 3,000 dak tali densema lir.

Iba Council nung International Relations Director, Pastor Ashebir Ketema-i, tangbo linük nung sayutsüngitsü atema temeden lir, ta metetdaktsü.

Akhidang communist yimsüsüba kübok Ketema-a 1974 küm nungi 1991 küm tashi tepuokdak yua liasü.

"Item ama tatalokba ya Tsüngrem ajanga lir. Tangbo iba linük nung sadem-sadema

sayutsüngiteter, kechiyong Tsüngremi mapa inyaker," ta pai ashi.

Ajisüaka paisa, reshikangshi putu ajanga tamangertem tashi itdakja liasü, aser tangbo linük nung nütsüng shilem 33 shibo Khristantem lir, ta ashi.

Honibarnü Graham-i Mark 10:46-52 nung ajemdaker sayutsüngia liasü.

"Yisu Khrista medenibo na tanela nung tenük tapok. Na shiba südir süaka Tsüngrem medenibo na tanela nung sensaker. 'Tsüngrem kü dang aochiang', ta ashitsü nai melunger asü?" ta Graham-i asüngdanga liasü.

Amongnü Graham-i Zakaria otsü nungi sayutsüngia liasü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Telatezü

(adj) kecha telemtet maka, tapijem mali (aimless)


* Pei mapa nung telatezü maka tapi agi inyakra takok mangutsü.

Telemtang

(v) lemsaba, sadangba, ana akümba (division)

* Ni akaba rongsen telemtang ka kenu nem agütsü.

OLONG PAITEP # 7091



TIPIEN

1. Tangar kinüngtsü den medemba sENCHI

- (7)

5. Tekolakba

- (3)

6. Belem

- (3)

7. ___oktsü

- (3)

9. Teküpokba tia nung alirtem

- (4)

11. Alen

- (4)

13. Tatsük mapang

- (3)

14. ___n

- (3)

15. Nisung telemsa

- (3)

16. Long ki

- (7)

LANGTSÜNGLEN

1. Takok Naga lima

- (8)

2. Lenden

- (5)

3. Noklang ter

- (4)

4. Makang

- (6)

5. Mola-moshia alirtem

- (5)

8. Aoer poktetdak

- (8)

10. Hanna-er jabaso

- (6)

11. Ken dang masü

- (5)

12. Aika aliba ki

- (5)

14. Züin

- (4)

OLONG PAITEP # 7090 TELANGZÜBA

TIPIEN :

2. Bangsemo, 6. Tiptem, 8. Jen,

9. Talila, 11. Aren, 12. Tzübo,

14. Alia, 16. Angati, 17. Odi,

18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,

5. Milen, 7. Tulu, 10. Laza, 11. Aben,

12. Tiyong, 13. Ajizük, 14. Aitsü,

15. Tasa, 16. Aina.

NAI-A YA METETTER MA



United States nung licensed ambulance tejentiba ajanga Guinness World Record ka yangluogo aser iba ya nisung anati Hollywood, Calif. nungi Hollywood, Fla. tashi 3,200 miles tema aoba atema lir. 1972 Cadillac ambulance nung Symbiosis Ambulance aser Axene Continuing Education nungi teshimtet telok ka mener ao. Parnok ya emergency medical service non-profit telok ka lir aser Guinness World Records adjudicator-i 3,233-mile drive ya "longest journey by ambulance" lir ta kuli agüja liasü.

Manipur nung Holi benjung longsolongpena mamunger



Yaoshang Festival in Manipur 2025 Date, Significance & Celebrations

Imphal, March 14, 2025

(Agencies): Manipur nung Meitei nungeri Hokolbarnü Holi benjung mungogo saka taküm agi küm anabububa kanga longsolongpena mamung.

Meitei nunger atema benjung tulutiba rongnung ka- Holi mesüra Yaosang ya anogo pungunü atema amunger aser Hokolbar nikongdang nungi tenzükogo.

Palace Compound nung Shri Govindaji temple complex aser tanga tesem kar nung mo agi

yangluba ki kar rongdoka benjungmungtenzü.

Taoba küm ama iba benjung dak sendakba tamangba yimsü inyakyim aser lokti saisapongtem dang agitsü.

Iba benjungmung nung entertainment programmes kecha magitsü ta tayongertemi ashi.

May 2023 nungi Manipur nung Meitei aser Kuki nunger tsüngda mepetmesü adoka rarayonga arudang nisung 250 shi süogo aser meyrjang aika

talidak maka kümogo.

"Taküm benjung ya onük ana atema tila ka dang amungtsü. Pei talidak toktsür aoertem ano pei pei kidangi meyipa mao. Ano benjungmung mapang ozüng alema inyakertemi arrtsülen alirtem amaktsü tsübuteper" ta Meitei putir Devdutta Phurailatpam-i ashi.

Yaosang benjungmung nung tanurtem pei pei kiyong nung kilen shia sema senzür aser taintem moatsür aser iba

Amit Shah-i Mizoram semdangtsü atema security akangshiogo

Aizawl, March 14, 2025

(Agencies): Union Home Minister Amit Shah-i Honibarnü Mizoram semdangtsü aliba ateama security akangshiogo ta Director General of Police Anil Shukla-i ashi.

Aizawl nungi kilometer 15 shi pilar Zokhawsang nung Assam Rifles tesepe belenba sentong nung Amit Shah adentsü.

Tongtipang lenmangtem aser tesemtem nung State police, Border Security Force (BSF),

as Central Reserve Police Force (CRPF) personnel mapa lemozükja lir.

Shah-i asüng nikongdang 1:45 ako nung Lengpui airport tonga arutsü aser nikongdang 3:00 ako nung sentong nung adenba sülen Guwahati-i meyipa aotsü.

Amit Shah-i Home Minister ka ama tang agi Mizoram pezübenbuba semdangter asütsü.

Assam Rifles relocation agreement ya October 2023

nung sign sütep aser April 2025 nungi mapa akümtsü. Iba tenangzüktep ajanga Aizawl yimti tiyongtsü nungi Assam Rifles teseptem belentsü.

1988 nung civilian karasüba sülen AR teseptem belentsü takhangba agüja aru.

Tesüiba nung infrastructure teblemstsütem ajanga mebelentet aruba sülen April 2023 nung Amit Shah-i Zokhawsang complex lapokja liasü.

Assam-i mezüngbuba Director of Prosecution shimogo

Guwahati, March 14, 2025

(Agencies): Assam sorkari tasen tentetba Directorate of Prosecution nung Director inyaktsü atema Makhan Phukan shimogo.

Pa ya Assam nung mezüngbuba Director of Prosecution asütsü aser ita pezü atema shimmer. Pa indang

itasen ya Rs 1,99,100 nungi Rs 2,24,100 plus allowances lir.

Maneni ita pezü atema Deputy Director of Prosecution inyaktsü atema Dhanesh Das, Santanu Bhattacharyya, aser Manash Haloi nunger shimogo. Parnok itasen ya Rs 1,63,030 nungi Rs 2,19,090 plus allowances pay scale nung lir.

"Assam sorkari Directorate of Prosecution nung mezüngbuba Director shimogo. Ozüng amertem yaritsü atema prosecution cadre balaka shimba state tem rongnung asenok" adener ta Chief Minister Himanta Biswa Sarma-i metetdaksü.



Tripura Chief Minister Manik Saha-i Hokolbarnü tetsür ka nem scooter sapi agütsüdang agiba noksa angur. Mukhyamantri Kanya Atma Nirbhar Yojana sentong tenzükba nung CM Saha-i general degree colleges nung azünger tetsür kaketshir 140 nem scooter lema agütsü.

Syria leniri küm pongu atema constitution nung meyongnem agütsü

Damascus, Metsüremi/ March 14 (Agencies): Syria indang interim President Ahmed al-Sharaa-i 'constitutional declaration' ka nung meyongnem agütsüogo, koba agi küm pongu 'transitional period' amokbanga lir, koba par Islamist teloki Bashar al-Assad atsüngdoker ita asem lir iba ya ataloker.

Iba document nung Islam ya tir indang tamangba yimsü ta shia lir, koba taoba constitution nunga shia liasü aser Islamic tesayuba ya legislation indang tera tongtiba lir ta drafting committee ajanga ashir.

Iba nungya tashi aser obendangba balala lemsaja lir aser tetsür temeden, pei tangatetba lemsatsü aser media temeden agüja lir.

"Syria asoshi ibai puti otsü tasen ka asütsü imlar, kong asenoki tashi maiter ajemrepba ochi obendang agi melener," ta Sharaa-i ashi.

UN special envoy Geir Pedersen-i iba mera pelashishia agizüker aser tzüzüng ozüng tsütsü tongtipang tapok ka asüngtsü, ta ashi.

Saka Syria northeast tsütsü Kurdish-i aniba administration-ibo iba sangdong ya aitsü aser ibai Syria asangsang den mapet ta ashi.

January ita sorkar anemba mitkar tanishir temi transitional period atema Sharaa ya tir inyaktsü sangdong aser Assad mapang 2012 küm constitution yaglubu agientsü aser taoba yimli indang parliament, army aser security agency tem

shibangtsü.

Anogo ter tejakdang Sharaa-i constitutional declaration yanglutsü atema züngsem tenet committee ka shima liasü.

People's Assembly tasenba yagi ozüng ajak yanglutsü. Yangji züngsem shilem asem nungi ana tiri shimba committee ajanga shimtsü aser shilem ka ya tiri shimtsü.

Teti atema constitution tasen ka yanglutsü atema committee ka kumtetsü.

Constitution tasen ka yanglua election shidak magi tashi ajak aliba sorkari linük nung yimsü süa alitsü Sharaa-i nangzüka lir.

Ajisüaka küm 14 tejakdang democracy bhukuma longkak aiter pua merenshitsü Assad-i totuyuba agütsüba ajanga civil war tenzüka akoksaba sülen pai tayongzüka jenti ajurur.

Taoba hopta Sharaa'er Sunni Islamist-i aniba sorkar bhukumer telungpur temi linük anüolen tzükum anasa aliba region nung Assad indang minority Alawite sect züngsem tepset ta tai tonglokja lir.

Sharaa-i iba azüdokshi mapa inyaker nem tapet temerenshi agütsütsü nangzüker aser nüburtem sunepa ayutsü nükjidong nung committee ka tentettsü totuyuba agütsü.

Ajisüaka Alawites nunger aika aser danga tamangba yimsü aser kin tila temi pa tebilemba asoshi shisabolur, kechiaser pa ya taoba mapang Syria nung al-Qaeda den sendaktepa aliba telok nung lenir liasü.

Russia aser China-i US dang Iran nuclear ken o jembi tenzüksü ayongzüker



Beijing, Metsüremi/March 14 (Agencies): Iran, Russia aser China nungi teshimtet lenir temi United States Tir Donald Trump indang administration dang Tehran-i nuclear sentong kanga kera inyakba mechi tenokdangba agüja aliba tembanga iba ken o nung linük balala densema jembishinü tanaben tenzüksü ayongzüker.

Ozüng agi memelai linük ka kisüng akoksatsüsa tenokdangba agüja aliba tembangtsü nüngdaker ta linük aseme nenshia ashir, ta China indang Vice Foreign Minister Ma Zhaoxu-i Hokulbarnü joint statement nungi zünga ashi. Iba mapang pa meketa Russia Deputy Foreign Minister Ryabkov Sergey Alexeevich aser Iran Deputy Foreign Minister Kazem Gharibabadi nokdaka liasü.

"Tang tensa adokdaksüba tera samadaksütsü aser tenokdangba, tashi amshiba yutsütsü asoshi tapet telok temi

inyaktsüla," ta Ma-i ashi.

Gharibabadi-i iba senden ya kanga tajung liasü ta ashi saka linük kari Tehran nokdangtsü meranga menüngdakba mepetmesü adokdaksür, ta ashi.

Hokulbar aonung Chinese Foreign Minister Wang Yi yagi senior diplomats asem den ajuruteptsü lir.

Trump-i asendenshir jembishinü tenzüksü meranga Iran Supreme Leader Ayatollah Ali Khamenei den tangatetep kati arutsü merangba mapang tang tesüsa iba senden ya amen.

Trump administration den Iran indang jembishinüba nung terenlok alitsü asoshi Russia aser China teyari nüngdaker, kechiyong linük ana ya US, France aser Britain den United Nations Security Council nung permanent members lir.

Security Council-i melaba yong 2015 Iran nuclear deal ya mapa kuma inyaktsü lenmang

lapoktsü, koba Trump-i 2018 küm pa tir kümzüker mezüngbuba mapang yutsü.

Chichiba 2015 nuclear deal kübok Iran-i uranium ya 3.67 percent purity tashi amshitsü aser uranium stockpile ya 300 kilogrammes tashi ayutsü mela liasü. Tang International Atomic Energy Agency (IAEA) ajanga Iran-i uranium ya seret 8,294.4 yua lir aser 60 percent purity lir ta ashir.

Iran-i par nuclear programme ya tajunglen amshitsü atema lir ta ashir.

Iran-i amokmerenabo iba ken o mejembitsü ta ashir, saka US tenokdangba ajanga par rongsenketzüng tashi mait kumtsüogo.

Trump-i jembishinütsü ajungshia saka mitkari mapa inyaktsü tekumtangtsü shia Khamenei dangi shiti ka zülüogo, ta taoba Hokulbarnü shia liasü.

Ibaji telangzüba agüja, "Dangar mesüshia merenshitsü merangba sorkar den jembitsü tejangraba mali," ta Khamenei-i US tir atalatsü. Tehran-i küm aika jembishinüa arur tezüngzüktep ka renema meyongnem agütsü aser Trump-i aji shisa, ta pai ashi.

Iran Tir Masoud Pezeshkian-ia amokmerena lia US den jembishinü masütsü ta ashi aser jembishinü akatsü US-i totuyuba agütsüba nung Iran mapudaktsü, ta ashi. Ajisüaka pai taoba mapang UN nung jembidang Tehran renema lir ta shia liasü.

Ukraine ceasefire atema Vladimir Putin taginüba kar lir

Moscow, Metsüremi/ March 14 (Agencies): Russia Tir Vladimir Putin-i Ukraine nung ceasefire alitsüba tangatetba agizüker saka yimjung yimya nung tasüngdangba lir ta ashi, shibai yimjung asoshi taginüba kar lemsatep.

Russia tir ya anogo 30 ceasefire alitsüba sentong nung telangzüba agütsüba lir, koba US den hopta tetenzüklen jembiba sülen Ukraine-i mulunga agizüka lir.

Ukraine Tir Volodymyr Zelenskyy-i Putin telangzüba ya "manipulative" lir ta ashi aser Russia nem tenokdangba tali agütsütsüla ta ashi.

Kasa mapang US-i Russia nunger totzü, gas aser banking sectors nung tenokdangba tali agütsü.

Russian ketdangsür temi Putin ya Brehostibar nikongdang US Tir Donald Trump indang special envoy Steve Witkoff den ceasefire atema jembishinütsü imlar ta ashi, shiba Brehostibarnep Moscow-i aru.

Iba senden ya amen asü mamenar mejangja. Hokulbarnü air traffic monitor Fliht radar ajanga Witkoff

amenba tayimtsü südi ta imlaba tayimtsü Moscow nungi ogo ta ashir, ta Russia indang state media ajanga ashi.

Moscow aser Washington ajanga iba indang sangdong agüja mali.

Brehostibar aonung aser Hokulbar anepdang Russia aser Ukraine nati tsükchir indang drone agi amakba tasen mali ta ashi.

Ukraine-i northeast tsütsü Kharkiv yimti nung tanurtem densema nisung tenet yiru ta ashi. Russia-i linük south tsütsü Tuapse yimti nung aliba oil facility ka nung mi tulu adokba ashi.

Brehostibarnü Moscow nung osangbener senden ka nung ceasefire indang jembidang, "Idea ya shidak aser onoki bhukumer, saka tasüngdangba kar jembitsü nüngdaker," ta Putin-i ashi.

Ceasefire ajanga mapang talangka tesunep alitsüla aser iba mepetmesü tera agientsüla, ta Putin-i ashi.

"Asenoki asen American colleagues aser partners den jembishinütsü nüngdaker. Ni Donald Trump dang call asütsüsa akumtsü," ta pai ashi.

"Onoki aji agizüker, saka bentettsü kar lir."

Item rongnung kaji Russia anüolen Kursk region ya lir, kong Ukraine mitkari taoba küm August ita amak aser litsü kar rakzüker, ta Putin-i ashi.

Paibo Kursk ajunga Russia-i tanaben amokbangogo aser yangji Ukraine sepaitem senzüka yuja lir ta ashi.

"Parnoki yutsür aotsü meranger, saka onoki amokbanga lir. Parnok indang hadir yutsüogo," ta Putin-i ashi. "Kursk nung Ukraine nungeri shimtsü lenmang ana lir - bendanga agüjang mesüra asütsü."

Ukraine mitkar tanishir Oleksandr Syrskiy-i anogo ka tejakdang ashiba agi, Russian sepaitemi komarka nungshiyonga Kursk region nung Ukraine sepaitem nüngdakba mapang tashi 'defensive positions' nung alitsü, ta shia liasü.

Brehostibarnü osangbener senden nung Putin-i ceasefire koma mapa kuma inyaktsü ta tasüngdangba kar agüja liasü. "Anogo 30 ya koma amshitsü? Ukraine sepai asendenshitsü atema asü? Nok-nü

bendenshitsü atema asü? Nüburtem nem training agütsütsü atema asü? Aser itemji kata masü? Sürabang aji komasür azüoktsü?" ta pai asüngdang.

"Rara tembangtsü shibai totuyuba agütsütsü? Kechi jenjang nung? Kilometer 2,000 dak tema nung ceasefire raksa nung shibai telemtetba agitsü? Item tasüngdangba ajak anatsülen nungi kanga junga asadangtsü nüngdaker. Shiba tasa nung yanglu?"

Putin-i indang indanga ma ta mashi, saka asangsang nung pai magizüksü renemer, ta Zelenskyy-i aonung video ka ajanga ashi.

"Putin-i Tir Trump dang indang-indanga pai maneni raraner, Ukraine nunger tepsetner ta ashitsü tsübor," ta pai ashi

Russian leniri "pre-conditions" aika yanglu aser itemji kata mapa kuma maotsü, ta Zelenskyy-i ashi.

Putin-i jembiba aser Zelenskyy-i telangzüba agütsüba sülen linük ana tsüngta tangatetba nung telemsa tejangja aliba ajiteter.

Ukraine-i noklem ana lemsar tekeratiba nung

ceasefire ka aser teti asoshi tangatetep kati arutsü atema jembishinü aginer. Russia-i ken o ajak tezüngzüktep ka nung telemtetba aginer.

Putin-i iba o jembiba sülen White House nung jembidang, Trump-i Russia lenir ajuruner aser Russia-i mapa shidak inyaka anogo 30 rara anena atatsü asüngdangba agizüksü imlar, ta ashi. "Asenoki Russia nungi ceasefire ka aginer," ta pai ashi.

Russia-i tashi ajak amshia February 2022 nungi amak tenzüka tang Ukraine litsü shilem 20 shi par kübok lir.

Iba rara nung Russia mitkar atema rarar nisung 95,000 dak tema takum samaogo, ta asadangteta lir, saka shidakba asürtem iba dang kanga agi tali asütsü.

Russia mitkari September 2022 nung sepai 5,937 süogo ta ta sangdongba sülen tongpang nung asüba yimjak nung sangdonga mali.

Ukraine-i tesüsa par nisung asüba December 2024 nung sangdong aser iba mapang sepai aser tanishir tem densema Ukraine nunger 43,000 süogo ta Zelenskyy-ia shia liasü.

New Jalukie nung Open Penalty Shootout Tournament temogo



New Jalukie nung March 14, 2025 nü Open Penalty Shootout Tournament alidang Executive Secretary, Western Sumi Baptist Akukuhou Kughakulu (WSBAK), Rev. Dr. Phugphoto Sema-i tayongzükba o jembidang tangokba noksa nung angur.

Dimapur, Metsüremi/March 14 (TYO): Liangmai Baptist Association LBA (N) Men Department ajanga March 14, 2025 nü Public Ground, New Jalukie nung Open Penalty Shootout Tournament ayongzüka liasü.

Iba asayamung tenzükba sentong akhumdong ama Rev. Dr. Phugphoto Sema, Executive Secretary, Western Sumi Baptist Akukuhou Kughakulu (WSBAK) aser tembangba sentong akhumdong ama Assistant Audit Officer Office, Accountant General aser

President, Peren District Football Association (PDFA), Raithu Newmai dena liasü.

Iba asayamung tenzükba sentong nung Rev. Dr. Phugphoto Sema-i asayartem aser lokti dang adianu ama ka kuma lungjemtsü ajungmeso.

Paisa arogo aser saisapong ajanga dang kin balala, oshoben balala süaka nüburtem lungjemdaksür, ta ashi.

Rev. Dr. Phugphoto Sema-isa nüburtem dang kati ka meima aser telungjem nung alitsü ayongzük.

Asayamung tembangba

sentong nung Raithu Newmai-i jembidang iba asayamung ayongba arogo dang pelaba lemsatop aser shilem agir ajunga ajungmeso takok angur nem tenüngsang agüja liasü.

Rev. Wichampau Nchang, Executive Secretary LBA ajanga pela agizükba o jembidang LBA den yaritepba asoshi pelaba o shia liasü.

Iba Open Penalty Shootout Tournament nung team 85-i shilem agi, kong SYO Samziuram A ajanga takok ngua senpet sen 20,000 agizüka liasü.

Senior Men's Inter-District Cricket Tournament 2025 osang

Dimapur, Metsüremi/March 14 (TYO): Sovima Cricket Ground, Chümoukedima nung March 14, 2025 nü Mokokchung aser Mon tsüngta Senior Men's Inter-District Tournament 2025 asayaba nung Mokokchung-i wicket pongu agi Mon akok.

Mon-i toss koka mezüng batting shim aser overs 32.5 nung runs 111 yangluteter asayar ajunga out asü. Mon nungi Renthungo Lotha-i runs timtiba (ball 29 nungi runs 26) yangluteta liasü.

Iba innings nung Mokokchung nungi Amongti Lkr-i over s 8 nung runs 22 agütsü aser wicket asem agia liasü. Vijay Rai-ia overs trok nung runs 23 agütsü aser wicket asem agia liasü.

Iba sülen Mokokchung-i 112 target ya ayong-ayonga tongteta overs 24.3 nung nisung pongu out sür menep. Mokokchung nungi Merenchamba-i ball 60 nungi runs 43 yanglutet (not out). Pa den yarisema Nihal Rai-ia ball 43 nungi runs 29 (not out) yangluteta liasü.

Mon nungi Mugavi Wotsa-i overs pongu nung runs 24 agüja

wicket pezü agiaka Mokokchung menokdangtet aser Amongti Lkr (Mokokchung) nem Player of the Match sempet agütsü.

Kasa anogo Nagaland Cricket Stadium, Chümoukedima nung Dimapur aser Kohima tsüngta asayadang Dimapur-i runs 156 agi Kohima madak takok ngua liasü. Dimapur-i toss koker overs 50 tembanga amenba mapang 315/7 yanglutet, kong Hem-i ball 87 nungi runs 88 yanglutet aser Anirudh Yadav-i ball 59 nungi runs 53 (not out) yangluteta liasü.

Kohima bowler temi run rate mazuoktet saka Samuel Zaputou aser Sepichem Jingru nati wicket ana-na agia liasü.

Kohima-i runs 316 ajungtsü nükjidong nung asaya saka parnok ya overs 48.1 buba nung runs 159 yangluteter asayar ajunga out asü.

Kohima asoshi Thupuluzo Lohe-i runs timba (ball 83 nungi runs 32) yanglutet.

Dimapur nungi Hem Bahadur Chetri-i overs 9.1 nung runs 27 agütsü aser wickets pongu agia pai Player of the Match sempet ngua liasü.

Indian Wells semi-final nung Draper-i Alcaraz den asayatsü



California, Metsüremi/March 14 (Agencies): Indian Wells tennis asayamung nung Jack Draper-i America nung Ben Shelton madak 6-4, 7-5 agi takok ngua anaben defending champion Carlos Alcaraz den semi-final asayatsü.

Britain nung Draper-i Grand Slam semi-final mezüng tongtetba ya September ita US Open liasü, saka Masters 1000 sentong nung last four alema kodanga modang.

Arishi küm 23 tain Draper yagi pezüben major champion bena alisang Alcaraz madak Honibarnü takok ngutetra, world's top 10 nung züngsemtsü maongka mezüngbuba angutsü.

"Ni teti küdak nüma danga bilemer. Tia maka tennis nung na atema teti ano asaya lir aser mapang shia nai na ajungba sayutettsüla," ta Draper-i ashi, shiba iba asayamung nung set kata nunga tamakok ajurua mali.

"Ni kodanga kecha agia tenük masünger. Ni teti takok

tali aginer aser asayar tajung den asayatsü maongka tali aginer."

Draper aser Alcaraz na pezüben asayadanga lir, aser pai khen akokba ya taoba küm Queens nung liasü.

Spain nung world number three Alcaraz-i Argentina nung Francisco Cerundolo madak 6-3, 7-6 (7-4) agi takok ngua liasü, koba pa asoshi California asayamung nung asaya 16 buba atongtepa takok angur alitsü.

Draper-i Shelton den asayadang serve nung points asem dang agütsü aser mezüng set angutsü atema break ka agi teperi liasü.

Ajisüaka Shelton-i asendenshir asayaa set tanabuba nung games mezüng asem takok ngua liasü.

Draper ya tezü danga game tasembuba nung anüngleni ball tali zükdokba yong tekum dangtsü agütsü saka pai tanaben ranglokshir asaya.

Shelton-i double-fault menaba ajanga semi-final spot atema serve aotsü Draper maongka angu.

Pa 0-30 agi tajemba liasü, saka iba sülen points pezü nguteta takok angu.

Ano Honibarnü kasa asayamung semi-final danga ka nung Daniil Medvedev-i Holger Rune den asayatsü.

Russia nung Medvedev ya tesüiba küm ana tashi iba asayamung nung runner-up jenjang nung tembanga lir aser pai France nung Arthur Fils madak 6-4, 2-6, 7-6 (9-7) agi takok ngua liasü.

Medvedev yagi takok angudanga mebenjonger saka Fils-i match point lia khen mezükshiba sülen tepela agi pezüben joktena liasü.

"Ni süngmang aser tezü nung tali kongshi. Ni mazuoktet," ta seed pongu buba nung alisangi ashi.

"Ni pa anasa jokzü. Iba sülen pa dang tatok meshi, kechiaser ni iba ama kodanga mebenjonger. Saka taküm ni asaya asem nung tamakok ajuru, anabo ni tera agi dang makok," ta pai ashi.

"Nai asaya nung tamakok tali ajuruba ama nai tamang makateti akumer."

Pai final asoshi Denmark nung Rune den asayatsü, shibai Dutch nung Tallon Griekspoor madak 5-7, 6-0, 6-3 agi takok ngua liasü.

GHS Kandinu nung Annual Sports Meet 2025 agi



GHS Kandinu nung Annual Sports Meet 2025 alidang tangokba noksa ka nung tongtipang nisungtem aser kaketshirtem angur.

Kohima, Metsüremi/March 14 (TYO): Government High School Kandinu pur Annual Sports Meet 2025 sentong KSU ground nung March 11-13, 2025 anogotem ayongzükba liasü.

Iba asayamung tenzükba sentong ya Kandi Public Union tir Hethinon Mesen-i moatsü.

Mesen-i iba sentong nung jembidang, alima nung nüngtugu asayartem ya asenok ama makamait jenjang aser yimdak-yimtsüng nungi pei nükjidong matong tashi meranga inyakaba ajanga takok nguyonga ao, ta ashi.

Pai kaketshirtem dang yimya tajung amshitsü aser temang anema ayutsü ayongzükba liasü.

Iba sentong nung yimtsüng nungi lenirtem, arogo lenirtem, kaketshir tentet, aser yimtsüng

trok nungi lanur aser club balala den tesayurtem dena liasü.

Sentong nung temoatsü meshia Akicha Kath-i sarasadem aser Thongsleno, assistant headmaster ajanga pela agizükba o jembia.

Khriekeyieno Zashumo menden liasü aser Kelvin Tep-i melepzüng o jembia liasü.

Iba anogo Vidya Pravesh atema NAS test liasü, kong NCERT coordinator, Dr. Tasongwi Newmei ya observer ama aden aser Martin Kath aser Jonilo Bukh na Field Investigator ama dena liasü.

Asemnü asayamung nung football, volleyball, race, sack race, three leg race, long jump, high jump, discuss throw, javelin throw, shot put amala asaya aser Yellow House-i overall champion aben.

BILEMDANGANG

"Temulungtetba lira lenmanga lir."